

A CRIRENZA

Appujata o' cantu ô muru,
scàgghi 'i lignu 'ncucciati cchê ciova,
taula a piezzi 'ncuddati nê lati,
cuattru piruzzi
e ppi ciùrri 'i ravanti nu trappu ri tila.

Nê ripiani,
misi 'n fila
'na puocu 'i buttigghi
cc'acitu e ccu l'uogghiu
e ri sutta, pusati â rinfusa
'na boccia cò meli
'u gghialuru cc'alivi,
e ppô pani 'n cannistru
fattu ri usa

'Ntâ cantiddu
cuattru libbra e ddù cuatèrna,
'a sumenza ri li sagghi,
e, ô cantu, ppi lucerna,
'na cannila,
ca ni 'llustra la mamoria,
siennu, comu a chiddu,
cu simina appuoi arricogghi,
e ppi mia, ancora ogghi,
cu 'n suspuru,
iu la viru ri prisenza,
ssà sòrta ri crirenza.

Anzi, a li vòti, tanta è la spranza,
'nca ri sira, ô scuru ô scuru,
nô pinzieru
iu 'i rintra mi ci ciuru
e ddà ci staiu,
e ddà ci ruormu
sulitariu.